



Kamis, 13 Januari 2022

Ogen: Ezekiel 24:1-14



La Banci Ienggo-Enggoken



Sada bagi lagu Karo: *Enggo me bias kena ku tami-tami turang.... Sibar je ngenca kengasupen pusuhku....* Isi pusuh sekalak jelma, arah kata sinibelasken enda nuriken maka enggo melala kesempatan siibereken alu name-nami, janah lit batas kengasupen sinami-nami ndai. Ibas batas waktu silit e maka enggo iputuskenna, sirang. Payo, man tep-tep jelma lit waktu ras kesempatan siipake kita guna nimai bagepe kesabaren si usahaken kita ngadapisa.

Dibata tuhu sabar ngarak-ngarak ras mpersingeti bangsaNa. Tetap isehkenna kata arah nabi Esekiel tapi bangsa e kepe tetap mekeng, kerina perbahanenna ngeliami ia. Tentuna enda ibas waktu si la kentisik, persinget ras pedah siialokenna la idiatena. Emaka ituriken Dibata arah nabina, enggo icubaken Dibata mbersihkenca tapi lanai kepe terbersihken adi langa ngenanami pernembah ate Dibata. Seh me pernembah e sabab labo terenggo-enggoken dosa-dosana kerina. Lanai teralemi, arus inanamina ulih perbahanen ras kinikengenna. Lias ate Dibata lanai tercidahken ras terbereken Dibata. Ukumen me arus ialokenna.

Kesabaren pe lit batasna, waktu si ibere pe lit paksana lanai lit. Enda jadi persinget man banta, ibas kegeluhenta pe ula min kita terkari-kari, ula timai reh pernembah ate Dibata. Rikut pe ibas hubungenta subuk ibas jabu, perpulungen bagepe masyarakat. Metenget nandangi kata pedah ras persinget, adi ibegindu sora Dibata wari enda ula kal si pekeng ukurta. Aloken, begiken dengen jeralah. Sabab lit paksana la lit kesempatan man banta, paksa ibere man banta pakeken alu mehuli. Sabab labo terenggo-enggoken kai si salah ras lepak e, arus sibentasi proses pertobatan. Timai Dibata kita!